

四庫全書

史部

欽定四庫全書

史部

續資治通鑑長編卷三百

七十一

詳校官檢討臣劉錫五

刑部郎中臣許兆椿覆勘

纂修官編修臣陳昌齊

謄錄監生臣黃洲

欽定四庫全書

續資治通鑑長編卷三百七十

宋 李燾 撰

哲宗

元祐元年閏二月辛亥詔正議大夫知樞密院事章惇
累有臣僚上言輕薄無行好為俳諧俚語及嘗受內臣
宋用臣饋遺以其大臣彈糾章奏不欲付外又議役法
明知未完俟其令行始相沮難近者每於簾前同輔臣

議政動多輕悖全無恭上之禮宜解機務可守本官知

汝州與放謝辭

此據御集閏二月二十三日下

制辭曰黜陟之由咸詢

至公進退之間尚存大體悖早繇法從亟預近司肆彼躁輕失於審重至於瞽御之列常交問遺之私比議後書本俾參訂當其敷納初不建明迨於宣行始興排沮務從含貸益至喧呶鞅鞅非少主之臣硜硜無大臣之節稽參故實稍屈典刑噫朕以幼冲仰煩慈訓苟乖忠實曷肅憲章其解政機往臨郡寄弗忘循省祇服寬恩

言者既數劾惇惇居位如故及惇與同列於簾前爭論
喧惇有他日安能奉陪喫劍之語太皇太后怒其無禮

乃黜之制詞錢勰所草

至於誓御之列常交問遺之私惟王巖叟及孫升章有其事蓋

指宋用臣也紹聖史官陰為惇諱故於巖叟章才舉其畧今乃仍用舊文亦太踈矣今取巖叟章及升章詳著之邵伯溫辨誣云蔡確既去章惇自知不可留於簾前與司馬光爭論後法喧惇無禮謂光曰後日安能奉陪喫劍太皇太后怒惇以本官出知汝州按司馬光正月二十一日在朝假至五月十二日乃出方惇責時光未參假也且密院與三省同進呈光差後文字蓋二月初光此時安得至簾前伯溫必誤奉陪喫劍或因爭論改法為光而發非面與光語也十月六日改揚州

左司諫王巖叟言臣竊以陛

下所與共天下之治者惟二三執政大臣而已得其人則陛下不勞而天下蒙福非其人則天下受敝而陛下獨勞故執政不可不用天下之賢蔡確章惇之大姦臣先已論之其次如韓縝之鄙俗不學張璪之陰邪不正李清臣之柔佞不立安燾之闖茸不才臣不知此四人自執政以來有益國家者何事惠及生民者何功啓沃陛下者何言天下之物望輕重陛下聰明必皆坐照不待臣言而後知方陛下更化願治之時股肱一人要為

一人之用若鎮輩累百何補陛下誠惜此地虛為所據
伏望陛下重惜名器別圖賢才任以大柄以為社稷之
賴以為生靈之福

巖叟此言不得其
時因章惇罷附此

巖叟嘗入對言自

古人君最難辨者忠邪今陛下判別之如別白黑又斷
之如此之勇此自古英主所不及如蔡確章惇二人用
盡姦計欲固位若非陛下至剛至明何以去得天下人
心無不懽呼鼓舞人心悅則天意得所以甘澤應之其
速如此仍願陛下益信天道益畏人心治天下之道無

他事只在合人心而已若人心外求之別無治道便是
怨亂之端上曰會得巖叟曰既遇陛下留心治道又荷
陛下聽納臣等不敢不極忠盡慮以天下之情天下之
事一一上達惟在陛下久而不厭常賜收採幸甚上曰

甚善

巖叟朝論係此於閏二月九日按章惇罷在閏二
月二十三日巖叟果以閏二月九日入對何由便

及惇罷大抵朝論月日多不
可信今掇取此附惇罷後

巖叟又言蔡確章惇既去

其餘無大姦皆柔佞之徒易為處置惟在常辨之使不
可入而已今政府闕員中外之人翹首拭目以觀陛下

所用陛下其戒之重之擇有德業聞望者進之幸甚陛下至明虛心以求之臣知必不誤然不可不更以告陛下上曰如何對曰大名之下有姦才少文之中多重德陛下須察柔佞憊愚無狀懷姦之人一進之在位即誤陛下後雖知其有害去之不易也他人見陛下誤用一執政不過咨嗟嘆息而已臣實與陛下同其責人以用之為是不知其功人以用之為非臣則有過臣不自量夙夜寤寐以吾君之憂為憂俟陛下得賢則臣心安以

此位非與百執事同百執事苟失其人則害止於一職
或大者一方而已執政失人則害及國家及天下不可
不謹 右司諫蘇轍言訪聞京城四門外所在白骨如
麻多是築城開濠死損人夫東門外又為茶磨棄水所
浸雖其間已埋瘞者土薄水深亦皆發露狼藉臭腐不
忍聞見陛下躬行仁政罷去苛法民心稍安而京畿及
諸路久旱近日雖稍得雨終未霑洽未必非積骸暴露
冤氣致此况方春長養正是月令掩骼埋胔之時臣欲

乞選差一二廉幹內臣計會兩赤縣官吏相度於閑隙地上以塲作數大墳如法藏掩其合破費用仍特支賜內藏庫錢誠使仁澤施及枯朽或能感召和氣卒致豐

歲

從轍所奏舊錄載於二十九日按轍自注云二十三日奏此今仍見本日

又言訪聞淮南

久旱雨全未足二麥並已枯死浙中米價雖賤而運河無水客旅不至米斗直一百七十以來民間闕食甚覺不易而所在官吏並未見賑濟及奏請別作處置臣竊見頃立義倉至今已十年所聚糧斛數目甚多每遇災

傷未嘗支散一粒民情深所不悅臣欲乞指揮淮南官
司先將所管義倉米數隨處支與闕食人戶兼將常平
米減價出賣及取問監司州縣因何並不曾申請擘畫
兼乞體訪諸路如有似此闕食去處一例施行

丙辰二十九日

詔諸路依二月四日
指揮即從轍奏也

先是劉摯言伏見京師所置水

磨茶場前後累有臣僚論列乞行寢罷尚未蒙指揮臣
契勘官自磨茶之初猶許公私交易故商販之茶或不
中官則賣之鋪戶自去年二月遂禁鋪戶不得置磨然

都下雖禁猶有府界縣鎮可以交易故客人不避重出
脚費津置出入至當年七月遂并府界一切禁其私易
於是商賈以茶至者觸藩抵禁須至盡賣入官而又使
牙僧制之不量茶之色品一切痛裁其價留滯邀遏其
狀百端此商旅之所以不敢行商旅不行故沿路征商
之數其虧額已多又磨河之水下流壅散浸瀦民田被
害者數邑聞去年已被省稅矣臣疑所得未必能當所
失而民間食貴茶場戶常失業抵冒刑罪又備賞錢利

害細瑣其狀不一至於傷國大體則臣未暇論之竊聞臣僚所言多送戶部戶部送太府太府送本場本場次第上之蓋所司知奉法取利而已安有肯為朝廷論義理哉臣亦聞議者云歲可得息錢僅二十萬緡以助經費何可廢也此以利言之者也苟以謂有助於用而不廢則何事不可為哉亦有道而已矣宋用臣未建此策以前不聞國用闕此二十萬緡也譬夫為人之子日攘竊於人取財以養其親為之親者知其如此顧利其奉

養而聽其為盜則可乎伏望聖慈早賜出自睿斷罷水磨茶場以通商賈以養細民以寬州縣稅額以免農民水害而上以副仁聖惠綏天下之意

摯此章蓋以八年上不得其月日元

祐元年閏二月二十九日乃罷水磨茶場從侍御史劉摯右司諫蘇轍殿中侍御史黃降劉次莊所奏也是

日右司諫蘇轍又言臣竊見近歲京城外創置水磨因此汴水淺澁沮隔官私舟船其東門外水磨下流汙漫無歸浸損民田一二百里幾敗漢高祖墳賴陛下仁聖閔惻親發德音令執政議救其苦尋蒙指揮畿縣於黃

河春夫外更調四萬人開自明河以疏洩水患計一月
畢功然以水磨供給京城内外食茶等其水只得五日
閉斷以此功役重大民間每夫日雇二百錢一月之費
計二百四十萬貫而汴水渾濁易得填淤明年又須開
淘民間歲歲不免此費訪聞水磨所入一歲不過四十
萬貫朝廷頃來改更敝法凡與民爭利者一切革去水
磨之事本亦係廢罷前戶部侍郎李定以邪諂進用不
知朝廷大體猥以四十萬貫課利惑誤朝聽依舊存留

且水磨興置未久自前來未有此錢國計何嘗有關而
小人淺陋妄有靳惜傷民辱國不以為愧況今水患近
在國門而恬不為怪甚非陛下勤恤民物之意而又減
耗汴水行船不便臣乞廢罷官磨令民間任便磨茶其
利甚溥伏乞指揮疾速施行

壬子戶部侍郎吳雍為天章閣待制知襄州從所乞也

大理少卿張奕知濱州

孫升十八
日言奕

朝奉郎蘇子元

換授供備庫使從戶部尚書曾布奏舉也 詔親王府

翊善朝請大夫王汾記室參軍朝請大夫鄭雍為久任
各特轉一官願迴受與子孫白身恩澤者聽 又詔河
北東西路永興秦鳳等路提點刑獄兼提舉保甲司並
依提刑司例各為一司 禮部言閤門參定到太皇太
后出入儀衛詔依所定 禮部尚書韓忠彥等言準朝
旨批送下東上閤門使曹誘等乞許閤門依儀令陞殿
進讀依舊侍立祇應參詳欲依所請兼通事舍人已下
引揖上殿班次等祇應亦合依閤門儀令施行從之

左司諫王巖叟言竊聞江西提舉曾孝廉挾私不法驅迫知撫州石禹勤下獄差有嫌隙人李秬為勘官非理凌虐一月之間致禹勤於垂命至家一夕而卒乞選朝臣就往根治重行竄黜詔差錢垂範往撫州根治聞奏

李秬錢垂範未詳何官十月二十八日孝廉追序編管

詔今後蕃官立功優異

者方許取旨差充本族巡檢仍當三資令樞密院遵守更不行下先是給事中范純仁言臣竊見熙寧後來用案問欲舉條雖曾隱諱終因罪人說出並得減等所

以容姦太多至彊賊兇徒易為幸免不肯改過却致良民受害遂至元豐八年四月二十六日別立條制諸彊盜已殺人彊姦或犯彊盜貸命若持杖三人以上知人欲告案問欲舉而自首及因人首告應減者並不在減等之例又至當年十一月四日續降敕文添入餘犯彊盜雖案問欲舉而首不減一十三字以臣看詳除已殺人彊姦於法自不合首不應更用案問減等外其貸命及持杖彊盜一例不得減等深為太重竊緣賊滿彊盜

能告別火死罪即得奏貸今因案問通出本火徒伴數目更多亦須坐死舉重明輕於理未當至於一名獨行彊盜若非即時捕獲則更無他人照證因疑被執贓物雖明賊若隱拒則官司無由用刑今於贓證未明之間其人便自招說豈得不行減等臣謹按嘉祐編敕應犯罪之人或因疑被執贓證未明或徒黨從就擒未被指說但因盤問便具招承如此之類皆從律案問欲舉首減之科若曾經盤問隱拒本罪更不在首減之例此敕

於理最當所以仁宗朝用之天下號為刑平臣今乞應
天下案問欲舉除於法不首不得原減外其犯罪並取
嘉祐編敕內上條定斷其後來敕條更不施行如此則
不破敕律用法當情上以廣陛下好生之德下則無一
夫不獲之冤又言近因王震在假權管勾刑房公事竊
見四方奏到大辟刑名疑慮及情理可憫公案並用去
年十一月二十三日敕只委大理寺並依法定奪更委
刑部看詳如實有疑慮可憫方奏取旨餘依法處死臣

體問未降此條以前自前年十一月二十三日至去年十一月二十三日一年之內四方奏到大辟案共計二百六十四人內只有二十五人處死其餘並蒙貸配所活將及九分自去年十一月二十三日降敕後來至今年二月終不及百日奏案共一百五十四人却有五十七人處死計所活纔及六分已上臣固知去年十一月未降敕已前全活數多其間必有曲貸然猶不失罪疑惟輕之仁自降敕之後所活數少其間或有濫刑則深

虧寧失不經之義臣先乞今後四方奏到大辟疑慮可
憫公案並仰刑部大理寺再行審覆節畧罪人所犯及
本處元奏因依令執政將上乞自聖意裁斷如所奏或
有不當並與免罪如此則刑法不濫施而死者自無冤
矣是日詔大辟刑名疑慮情理可憫公案令刑部看詳
不得致有枉濫從純仁之請也

二月末純仁
奏請附此

右司諫

蘇轍言竊見三省同進呈臣前奏乞將民間官本債負
出限役錢及酒坊元額罰錢見今資產耗竭實不能出

者令州縣監司保明除放事奉聖旨令戶部勘會應係
諸色欠負窠名數目仍契勘欠戶見今各有無抵當物
力開具保明聞奏臣竊謂朝廷將救民於溝壑之中其
施行節次當如救焚不可少緩前件指揮令戶部開具
欠戶見今抵當物力此事不在戶部惟州縣可見若令
戶部取之州縣文字往來動經歲月反覆問難何時了
絕救民之急不當如此乃有司出入之常度而非朝廷
救災之體如陛下將布德施仁以收民心答天意但使

惠澤滂流雖民間小有僥倖何損於德況此積欠經涉
久遠凶歲疲民空煩鞭箠必無所得縱獲毫末無補國
計乞特降朝旨直下諸路監司與州縣一面依下項除
放結罪保明聞奏所貴小民早被聖恩不至失所別致
生事謹具條件如後一官本債負在京乞委提點司與
府縣及市易官外道委轉運司與州縣同取索逐戶元
請官本若干經今多少年月合出息錢若干逐戶從請
出官錢後來已納到官本若干息錢若干通計本息未

及官本而家業蕩盡者亦與除放如尚有些小家業而

見今孤貧不濟者即權住催理官吏結罪保明聞奏聽

候敕裁一拖欠坊場錢

所委官同前項

乞取索逐户元認淨利

錢若干自開酤以來違欠月分合納罰錢若干將本户

已納到淨利及罰錢通計若干如已通及元認淨利之

數即行放免如通計未及元認淨利之數而家業蕩盡

者亦與除放如尚有些小家業而見今孤貧不濟者即

權住催理官吏結罪保明聞奏聽候敕裁一出限拖欠

役錢今來朝廷已行差役法即免役錢別無支用雖使
差役未了間時暫留舊雇人執役自有從來寬剩役錢
支遣其拖欠役錢乞與一切放免右臣前奏係二月十
五日及今已四十日而行遣紆緩未知何時恩澤可以
及下伏乞陛下深念欠負人戶枷錮已久衣食不繼父
子離散其愁苦無聊甚可哀憫斷自聖心依臣所乞特
與除放無使有司爭執細故遷延歲月所得無幾而民
間窮困小則病瘁怨苦感動陰陽大則計較死生起為

盜賊所失轉大雖悔無及臣不勝區區為國深慮

二十九日

行

癸丑中書舍人范百祿詳定編修刑工曹條貫代給事

中王震也

御集二
十五日

甲寅龍圖閣待制兼侍講趙彥若為兵部侍郎兼侍讀

新除給事中孫覺依舊為右諫議大夫

初五日除
給事中

詔

尚書侍郎學士待制及兩省御史以上國子司業各限
一月內舉經明行修堪充內外學官者二員 詔章懿

皇后父賜太師開府儀同三司越國公李仁德特追封

京兆郡王從泰寧軍留後李珣等奏也

實錄於三月二日又書此誤也

今削去止一書之

朝請郎權發遣河北路轉運使李南公朝

奉郎權發遣河東路轉運副使孫覽兩易其任

三月八日劉摯

云以累赦放逐使人劉彛為朝奉大夫

乙卯正議大夫同知樞密院事安燾知樞密院朝議大

夫試吏部尚書兼侍講范純仁為中大夫同知樞密院

御集在閏二月二十四日政目與御集同呂大忠雜說元祐初申公與司馬溫公同為左右相溫公久病不出

申公數於薦前薦呂大防范純仁可大用已而以大防
為尚書左丞純仁命未下也溫公一日召蔡陽公至府
第謂公曰范純仁作執政固好呂大防是韓縝宣撫判
官相公何故却薦作執政蔡陽公即意答公曰相公
且看即今從官誰是勝得呂大防者溫公默然久之曰
是也都都不如呂大防二公同時並相其不相疑如此之
深其易曉如此之薦前後任事所無也初申公薦大防
可在密院純仁可在中書薦中誤記遂以大防為右丞
久之以純仁同知樞密院大防為右丞在閏月十八日
丙午純仁為同知在閏月二十七日乙卯相距才十日
此云久之
恐誤也
左司諫兼權給事中王巖叟言
舊錄不載王
巖叟封駁事

止於三月十五日載范純仁告命極為踈畧新錄
并十五日所書亦削去不知何故比舊益踈畧矣
今月

二十五日伏覩畫黃除同知樞密院安燾知樞密院試

吏部尚書范純仁同知樞密院者臣謹按燾資材闡茸
器識暗昧立朝以來無一長為人所稱備位樞庭不能
自立惟知佞事章惇陰助邪說以養交取容曾無建明
少裨國論公議所鄙中外一辭臣當言責方以逐大姦
為先未暇及燾非敢不為陛下言也今大姦既逐適欲
論奏而燾更超用其何以慰天下之望弭諫臣之言舊
位且非所據況可冠洪樞顓兵柄今邊鄙大事正賴謀
謨使燾當之何以勝責伏惟國家樞密之重名器之隆

非所宜誤以屬人為社稷憂也所有畫黃謹繳封進其
范純仁除命伏乞分為別敕行下又言左司諫之職屬
門下省近蒙本省批狀差權給事中給事中職當論駁
臣雖暫權義難苟且今日伏覩畫黃除安燾知樞密院
公議不允臣不敢放過門下緣過門之後即是施行既
已施行益難追改據燾不才無補陛下而玷處廟堂坐
尸厚祿考之物論謂當置之散地別進賢才今乃超遷
總領機務位愈高而德愈不類任益大而才益不宜必

恐多致人言上煩聖聽臣所以輒先封還乞陛下更加
裁慮或陛下必憐其人未欲遽行罷免則願且勿升其
位但令與范純仁並為同知密院可也臣亦再三為陛
下思之惟如此頗為易處伏望聖慈恕臣踈愚僭易之
罪察臣區區愛國之心特垂採納貼黃稱臣蒙陛下任
之言責惟願陛下無一毫差錯臣始心安若聞一人議
及朝廷除用未當則如臣之身自有過失所以不避煩
瀆一一進言幸陛下省納使臣得盡其愚以圖補報燾

之闡茸不才終不是當大任之人候陛下別得賢才即
宜罷免以協公言巖叟又言臣兩次論駁除安燾知樞
密院敕命久之不下意謂聖慈已賜開納今竊聞已有
指揮門下省更不送給事中書讀令疾速施行臣聞命
皇恐不知所容陛下必以臣為違拒睿旨遂一面施行
仰惟國家置官司正要上下相關防相審察惟恐有失
誤所以重謹之至況給事中喉舌之任若不由過則不
成命令何所不可臣違君之命至於再三雖陛下優容

未加誅戮臣自知罪不容矣然臣少而讀書本學事君之道今不敢不以其所學事吾君也臣位可奪也而守官之志不可奪也身可忘也而愛君之心不可忘也守官之志可奪則陛下今日雖喜臣從命後日將不復信臣矣愛君之心不忘則陛下今日雖未諒臣後日將復念臣矣陛下聰明燭照豈不察臣之所以區區効愚忠而不已者為陛下耶臣自為耶每與大臣結怨仇而不避者為國計耶為身計耶陛下欲人阿意順旨則易欲

人抗言執議則難臣不為其易而為其難亦何心哉但
恐因臣不能為陛下守職事而獲沮抑則人人務為其
易非朝廷之福也古人有言曰賞當賢則臣下勸罰當
罪則姦邪止此國家之大柄而人主不可以不謹也陛
下一日逐章惇為汝州可謂罰當罪矣一日擢范純仁
為執政可謂賞當賢矣然安燾之進則未有所當此臣
之所以力為陛下言也陛下曰必欲行之臣曰必不可
行則是以臣抗君也宜乎死有餘責然臣言之不已為

之不疑者以臣職當然也守職而不敢曠乃所以奉陛下也伏望聖慈特賜採納貼黃稱章惇之逐則是陛下知其惡也安燾之進是亦陛下知其善也惇之惡喧然流播於人故其逐也人快之燾之善寂然無聞於人故其進也人皆疑之陛下或以臣為執所見今新給事中傅堯俞歷任四朝老成舊德有天下公望之人也已經告謝陛下不俟正謝指揮供職代臣以觀所見如何陛下退臣則可進安燾則不可願陛下深賜裁慮巖叟又

言臣自來聞士大夫相與語曰安燾每與衆執政議事有終席不曾贊一句議論時其不才如此又聞朋附章惇助為姦言動搖正論沮格聖恩而意亦不樂陛下惟新之政其無識又如此平時備位在下猶為忝竊況可以進登上列專右府之寄主決大議哉祖宗以來有虛宰相之位以參知政事當國者今不置知院以同知院行樞密院事於體無害既不傷陛下之恩又不激衆人之議使小人知懼而謹分大臣畏威而循法以正天下

以清朝廷在陛下日新之德非小補也貼黃稱陛下至聖至明豈不察人臣職事放過則易不放過則難臣不為其易而為其難亦何心也小臣所以區區堅持不敢苟且施行者為陛下守職事耳陛下若不容臣與職事而必奪之臣亦無恨以臣為抗命而賜之罪臣亦甘心但恐自今人人皆務為其易而不為其難非朝廷之益耳惟陛下省察幸甚臣每見衆人攝職事多務苟且皆曰三五日間何須如此殊不知命令之下朝廷所繫至

重一有所失則紀綱搖動議論沸騰有累聖政此臣所以夙夜深思不敢忽也陛下既重改成命必欲施行則願聖慈指揮門下省別差官權給事中以全孤臣之守又言臣伏蒙聖旨指揮以所除安燾敕命已行宜令臣書讀施行者便當恭稟睿詔即時奉行緣事干國體重輕繫君道得失臣為諫官既當言承乏給事中又當駁非臣好為高論喜忤大臣以自取怨也惟陛下照亮愚臣幸甚今陛下進忠退姦一新大化之時而容柔佞雜

進使四海有感陛下之心忠臣有不自厲之志其可乎
肅之非才以久塵樞近既不能自有所發明又明附彊
臣章惇助為不公之論沮格聖政自當隨惇罷黜而反
蒙褒進更長樞庭何以協公言何以示懲勸臣早來又
於諫職繼有論奏伏望聖慈深賜省覽所有畫黃謹再
繳連封進其范純仁除命伏乞分為別敕行下貼黃稱
如臣放過門下必致諫官御史交章攻擊上煩聖聰恐
肅雖欲且安舊位亦不得陛下若容其備位徐待求賢

則不宜更有所遷升反為不才之累也

時左司諫王巖叟兼權給事中

即繳錄黃并以諫職上章言燾不協人望乞分為別敕既駁而命復出者再已而告命遂不由門下省巖叟請對言益切至簾中諭曰駁議甚當極知公正祇為告命已出巖叟退就閣門復上章論其當罷繼降手詔俾速書讀中語甚峻巖叟持之愈急復以司諫給事兩職各上疏云臣為諫官既當言承乏給事又當駁非臣好為高論喜忤大臣且命令斜出尤損紀綱凡八上章得請乃已此據張舜民誌巖叟墓舊錄不載巖叟封駁事止於三月十五日載別出范純仁告命極為踈畧新錄并十五日所書亦削去不知何故比舊錄益踈畧矣巖叟朱光庭二十八日同對必及封駁事但新錄舊錄俱不載耳巖叟章據本集并附見當以舜民墓誌稍刪削穿聯之巖叟朝論云閏二月二十二日權給事中二十五日駁安燾除知樞密院敕二月二十六日再駁遂更不

令給事中書讀直自門下侍郎處過送尚書省施行

右司諫蘇轍言臣近奏論

諸執政才力長短以謂張璪李清臣安燾皆斗筭之人持祿固位安能為有安能為無但陛下新臨天下人材衰少此數人者未可一朝盡去故且存而勿論若陛下必用鎮撫中外彈壓將帥如彼三人皆不足用臣竊見近日李清臣自尚書右丞為左丞雖號稍遷而職位相近未至超擢臣是以不敢復言今者安燾自同知樞密院為知院度越四人直出其上中外驚怪不知陛下何

以取之而遽至此臣觀燾之為人才氣凡近學術空虛不逮中人僅免過失先帝特以燾萬里涉海故酬其勞置之侍從燾謹默自守遂至樞府既忝重任畧無建明與張誠一同事則隨誠一與章惇同事則隨惇高下俯仰惟彊有力者是從奈何舉天下兵革之重全以付之若陛下憐燾未忍罷去臣願令且守舊職與范純仁共事如此則樞密院與三省俱無長官亦無闕於事至於躡等用人非衆人共稱其賢於義不可 右諫議大夫

孫覺言臣竊聞有旨安燾除知樞密院權給事中王巖
叟封還不下臣以為安燾材識未有過人者臣嘗論執
政數人皆當罷黜燾其一也臣以言韓縝未効未敢論
列今陛下乃以燾知樞密院則是燾已遷矣臣安得晏
然而已乎若燾之材能不為士大夫所稱徒以舉進士
名在第三因緣以至館職先朝逐去言事臣僚過多無
人可用故燾得備位於朝已而遣使高麗以燾為使者
不以海道為辭亦人臣之常事耳遂稍擢至戶部尚書

同知樞密院事燾之才品中人以下臣竊以皇帝陛下
太皇太后陛下進退大臣以新庶政若燾在所先罷者
也不謂陛下因惇之罷拔范純仁在密院純仁立朝本
末習知邊事非燾之比也朝議以為陛下於安燾未忍
即有所去則亦以為同知院事令與純仁同列而處其
上可也何遽遷之乎臣以為巖叟封還稍為舉職伏乞
特留聖念 御史中丞劉摯奏臣伏聞同知樞密院事
安燾除知樞密院事臣竊以朝廷進用大臣必以有德

其次以有功然後上重國體下厭公論謹按燾備位執政以來未聞有一善見稱於人亦不聞有一言少補於國朋附章惇助其彊橫以養交固寵中外鄙之惇既貶逐燾亦自當罷去陛下篤於恩舊尚且包含固已為燾之幸豈可一旦無故超越左右兩丞及門下中書侍郎而暴有進擢臣不知陛下以何名進燾謂有德邪有功邪誠無以慰天下之望止言者之辭臣欲乞聖慈如未欲失大體罷燾只乞且令依舊為同知樞密院事於聖

恩無所傷於燾無所害於名器為重於公議必服況今
制命未下追止無難伏望速賜處分貼黃臣早來面奉
德音以燾受遺舊人欲全恩禮臣以謂燾無功德有罪
惡不使罷去足以為恩豈宜更有不次遷擢恐命令既
下言者必須交攻至於理道所極則燾之舊位亦不可
保却虧失恩遇伏望但令同知本院以允清議摯又同
殿中侍御史孫升奏臣等伏聞除安燾知樞密院事因
給事中兩次封駁不當遂蒙特降指揮更不施行送本

官書讀直下吏部施行臣等竊見安燾除差未論當否然朝廷命令之出必由門下書讀省審而後行所以審重防察示至公於天下也今陛下除一大臣因其封駁不當遂廢給事中職業不令書讀則是命大臣以私矣私門一開將何以振肅公道維持紀綱乎伏惟陛下臨御以來政事之舉皆合至公獨此一事設施乖戾恐於盛德所損不細臣等深為陛下惜之伏望速降指揮追還所除告命及詳覽臣僚前後論列安燾章疏別賜指

揮以全朝廷典法貼黃制敕不由門下及省審書讀不備則不成命令其經歷之司必不敢放過被受之人必不敢當摯又言檢準元豐三年七月十八日九月二日中書劄子節文奉聖旨應差除及更改事件到封駁司限當日鈔錄關報御史臺諫院後至元豐五年中給事中舒亶申為新制撥封駁司歸門下省為封駁房如合依舊關報不知以何官司為名恐內省無關報外司之理奉聖旨更不關報自此已來臣僚差遣政事更革臺

諫不復聞知朝省之上禁賞嚴重無敢傳者直至敕命已到諸司諸司奉行訖方隨行遣闕報其間若有未安理合論列則往往事已在數十日之後臣下回已行之命固非易朝廷為反汗之令亦必難臣曾於去年十月十九日具狀申請至今未蒙可否指揮今來欲乞聖慈檢會臣前奏特賜指揮許依舊制應差除及更改事件委給事中限當日實封牒諫院御史臺所貴命令未宣於外可以先事論奏而朝廷亦易於聽從別無違礙貼

黃諫官御史臺承受到給事中牒報事件乞嚴立禁約
不得漏泄仍不下司又貼黃封駁司改為封駁房其名
號雖異而職事不殊本房既不可闕移然今給事中乃
封駁之任也宜自給事中移報臺諫為是兼給事中主
封駁臺諫官主論列交相檢察以補成政令其任一也
於闕報無嫌

元祐元年閏二月二十七日奏此去年十月十九日初奏不從此奏得請在三月十日

八日

丙辰左司諫王巖叟右正言朱光庭進對太皇太后曰

知卿等公正不由執政用卿朝廷有闕失一一言來但安心言事太皇太后垂簾官家又年小不比神宗時若非臺諫公正忠孝乃執政得人一耳目何由得盡知天下事謂之執政若不執奏事却要何用臺諫官若畏避何以立事卿駁安燾甚當知卿公正只為君命已出又只是次遷今後更不遷也非不知安燾不才無公望但以顧託不欲盡去卿等須會得若據執政迎合欺罔盡合趕了只為受遺不欲得卿等所言多已施行除是卿

等照管不到之事則休不避怨仇人之難事卿等但安心言事太皇太后一一主張這裏不肯容易卿累薦程

頤今已除宣德郎校書郎來日待行出文字召對

頤除承奉

校書在十八日召對在三月十四日

又曰差除若是他有人望不惜他合

得人望自然無言語掩人口不得又曰用賢不當避親却恐不當如蔡確等卿等須知神宗時執政若一一進言安得有今日天下許多事蔡確來問人言臣私事乞降出答曰不惜降出別不為私事只為卿先帝時不進

言確云此則臣之罪也亦曾如此宣諭韓縝又曰章惇
毀韓縝李清臣張璪安燾如奴僕簾前亦無禮便是平
交亦須存事體這裏是甚處七八次將入文字來甚不
遜改更事天下人皆喜只惇不喜本候他自請圖教去
得好却是他如此不免貶去一似蔡確得他請出便乘
勢教去也

此據巖史朝論增入舊錄但云知卿等公正不由執政用卿朝廷有闕失一一言之知人

為難堯舜猶然又曰民間已蘇息未愛民當如赤子

又曰知人為難堯舜猶病之

又曰民已蘇息未愛民當如赤子

此兩言據舊錄增入巖史朝論乃無此

巖叟光庭退而同上章言自陛下臨御以來大小之政
無一不當近日進用忠良退斥凶邪猶為英斷天下之
人皆知敬服懽喜惟是今升安燾為知樞密院一事便
是朝廷闕失臣等誠不忍容燾妄進却累全美燾不才
無公望又陛下素已深知未加斥去已是大恩而進知
樞密院乃為太過在西府雖為次遷緣對東府即是躡
過左右丞中書門下侍郎四等所以外議終不為允伏
望聖慈取天下公言且令燾只居舊職上則不傷陛下

之恩下則不起衆人之議中則使燾居之亦安庶全陛下日進之盛德此臣等區區之心所以報陛下也惟乞留神聽納

丁巳安燾辭免新命令學士院降詔不允敕黃付左司諫王巖叟書讀巖叟封還敕黃乞特依安燾所請只令依舊同知院事上可以表聖恩之優厚下可以息衆議之紛紜中可以全安燾安處其職又言陛下若因燾辭免遂收新命既得愛重名器之體又有聽納諫諍之名

傳播天下益彰聖德伏聞近日差除盡出清衷無不允
當外庭之臣交口稱頌仰體聖心亦自愛此善政惟素
不才未副陛下任賢之意臣所以不避煩瀆再三納忠
誠不欲僥倖之人上累聖政全美伏望睿慈必賜采納
詔今後差知西京大名應天成都太原永興成德軍
秦延青鄆杭瀛定慶渭熙廣桂州並待制已上人如未
至上件職任曾任正提刑已上即權餘並權發遣其兼
安撫總管等自依舊條其知河陽荆南江寧潁昌河中

鳳翔陝府陳襄鄧潞楊臺蘇越洪潭泉福梓徐曹蔡鄭
滑相邢同晉廬壽湖明宣滄齊棣州已上並差曾任正
提刑人餘並權通判已下資序權發遣其見任提刑已
上因差知州即具歷任取旨 詔在京水磨茶場廢罷
其結絕官物等令戶部措置施行從侍御史劉摯右司

諫蘇轍殿中侍御史黃降劉次莊所奏也

政目云從劉摯等奏摯轍

奏在二十三日黃降劉次莊所奏當考元豐八年六月三日九月四日皆合參照

又詔八路

知州通判簽判監司屬官承務郎以上知縣大使臣員

闕並歸吏部差注內接送人合支雇錢者並只差兵士
內有專條并奏差及一時指揮及其餘闕并水土惡弱
及自來差攝官處並依舊

政目同

又詔開封府選兩赤

縣官檢視京城門外暴露白骨如法瘞埋訖奏仍並支

常平錢

二十三日
蘇轍云云

又詔應內外見監理市易官錢在

京委太府寺開封府界令提點司諸路令轉運司各限
一月取索逐戶元請官本點勘特許以納過息罰錢充
折如已納及官本即便與放免并坊場淨利錢亦依此

許以納過罰錢折填淨利以上通折外尚欠官本錢并
淨利而家業蕩盡及無抵保或正身并保人孤貧者權
住催理及今日已前積欠免役錢與減放一半餘分限
三年隨夏稅帶納所有今月四日勘會欠負指揮更不
施行又詔戶部疾速指揮諸路如人戶委因災傷闕食
並依今年二月四日指揮施行二事並從右司諫蘇轍
所奏也

後一事舊錄有之新錄削去其第二事舊錄又見三月二十八日新錄削去蓋舊錄重出也

詔保安軍順寧寨主許明特罰銅十斤廊延路經畧

司保安軍各特放罪初西人所將馳馬馱乘過數合給
回而明輒以車馬般載赴闕故也 又詔陝西河東路

經畧司指揮沿邊城寨使臣等約束並邊人戶及所遣
探事人今後不得於界外無故侵擾 中書外省奏舊

制臣僚封贈父母各有詞欲乞今後並依舊制仍應中
大夫防禦使已下用海詞外其太中大夫觀察使已上
用專詞從之 戶部言乞罷諸州常平管勾從之

檢初
置年

月附注元豐八年十一月
十四日政目所書可考

是月殿中侍御史呂陶言君子小人之分辨則王道有成邪正雜處於朝則政體不能純一此天下安危治亂所繫甚大世主當審其取舍也恭惟太皇太后陛下臨御以來念祖宗積累之難思先帝倚託之重保佑聖嗣安養生民剷除敝事覃布德惠召用一二舊老與之裁正法度緝完紀綱以傳萬世欲皇帝陛下他日循而行之則宗社乂安如泰山之四維聖心所存豈不遠哉然大臣之異議者則不能盡誠竭力以稱太皇太后之意

尚且依違偷惰務習故態觀望反覆互持兩端推原其情蓋有三說一曰先帝之法豈可遽改他日嗣皇親決萬機則吾屬皆有罪二曰國家用度至廣非取於民何以足今一切蠲放餘利則遂見闕乏三曰司馬光老且疾將不能終其事萌此心者蔡確韓縝章惇張璪是也安燾李清臣則依阿其間俯仰徘徊以伺勢之所在而歸之爾謂先帝之法不可遽改乎則三王之政不免有倣為其有倣而改之所以宜民利物而全其治體臣嘗

觀去年正月甲辰詔書乃曰嘉與四海洗心自新則先帝彼時已知法之將敝有欲改之意矣今太皇太后以母道臨制天下順元元之所欲而與時損益蓋以成先帝之志也且君子愛人以德小人愛人以姑息責難於君謂之忠謂吾君不能謂之賊今之大臣欲改法者使天下無憾於先帝是待其君甚厚而愛之以德也於先帝為忠也其不欲改使天下有憾於先帝是待其君甚薄而愛之以姑息也恭惟皇帝陛下端重仁孝出自天

縱佗時親總萬機而見天下有太平之實追觀今日之事是非得失回覽其端則必以厚於先帝而愛之以德者為是薄於先帝而愛之以姑息者為非忠於其君者為得賊於其君者為失矣然則欲改法者佗日將至於無罪不欲改者他日將至於有罪不當私憂而過計也謂國家用度非取於民不能足乎則今日之議法非不取也惟患小人苛刻而取之多故參酌中道而除去煩苛乃百姓足君孰與不足之義也伏惟太皇太后陛下

慈愛恭儉德與性成內無土木遊玩華靡之費外無干戈攻戰過濫之賞節用裕民既得其道何俟過取而後給哉謂司馬光老且病將不能終其事乎則修講法度本為宗社萬世之計不問光之存亡假使光雖物故而朝廷圖治之意豈肯中輟哉亦何必望望然幸光之死也謀人國而立意如此是昔日負先帝今日負陛下也當熙寧元豐之際小人之黨暴布於天下急利者爭斂財急功者爭用兵結民怨起邊禍日甚一日彼數人當

此之時或領大農或處近侍或總計省或居二府然而
未嘗獻告一言建明一事惟持祿固位苟度歲月以民
事驗之其極也則有市易之息有堆垛之利有江湖之
鹽法有京師之茶禁以軍政驗之其極也有乞弟之役
有蘭州之取有靈武之役有永樂之陷凡此數事結民
怨則深起邊禍則大然皆非先帝之本意乃大臣無所
補報而有以成之臣故曰昔日負先帝也今太皇太后
惻然念生民之困窮思有以安固邦本乃講求治道舉

偏補敝改正法度以付嗣君為萬世之福天下之人傾
耳側目日望太平數人者當此之時不能引咎改過猶
懷向之三說觀望而不欲為或為之而不欲盡其事是

以罷市易則尚存抵當放保甲則須俟歲首黜江淮運

鹽之臣則遷延累月而後行

去年秋冬以來言者屢陳江淮運鹽之害執政遲留

其事後

遣川蜀按茶之使則巧為之詞而不發

按察川茶黃廉

近詣兩府稟議利害皆為章惇所沮且言茶法決不可
改富商大賈異論不足聽惇出近言欲仍舊榷茶也

至邊鄙之大患存捨之長策皆置而不議及司馬光一

獻差役之法則昌言其疎竊笑其迂其徒從而和之妄
傳章惇有五利七難之說喧播於外士民聞者莫不駭
嘆臣故曰今日負陛下也此數人者其處心積慮大畧
如此當此之時決不可鎮安社稷矣若乃居家之隱慝
在朝之細過聞望之素輕踐歷之太乖則言者陳之已
詳陛下知之已久臣近領臺職不敢復道今蔡確章惇
已罷免人皆快之鎮瑯輩猶備位實未厭天下公論也
伏望陛下特出聖斷以辨君子小人之分無使邪正雜

處於朝罷黜績等以謝天下則王道之成政體之純一
易如反掌耳又言伏見韓績自備位宰府以來内外文
武百執事至於閭閻聚落之人無不竊議交毀以為非
據蓋其人自為小官以至大吏行檢乖僻譽望衰輕有
所欲為則任其狼復而繼之以無恥任秦州經畧使日
酣飲無度誤謂指使使臣窺其私而箠殺之奉使河東
日肆為醜行形於翰墨為邊臣燕復所把持乃至呼復
為兄而庇其過在密院則諂事張誠一待以家人禮每

劇飲大笑歎密無間欲因誠一以結宦官此最爲士論
所深疾者也其使河東日實爲北使梁允所屈遂割吾
境上形勝之地數百里以資敵人使吾沿邊弓箭手熟
戶等去墳墓桑梓之日哀號怨憤所不忍聞乃奪官員
職田并五臺寺家田以處之其襟要控扼去處多爲彼
有辱命虜國罪當萬死先帝志在收復幽燕不欲聖機
泄露一切包忍既而梁允以拓土之功歸其國爲兩府
吾亦用韓鎮以示不疑耳其實非大用也自陛下即位

以來乃敢賣弄威福崇植親黨差除一人行遣一事多
不協於至公郭茂恂王欽臣在陝西為監司皆有醜迹
惡聲喧聞一道其事連及鎮姪宗儒今為鎮主張差茂
恂庫部郎中玷辱清選莫此為甚王說前知徐州附會
吳居厚極力掎斂得替到部緣鎮之舊忽除省郎言者
彈劾遂罷其職仍知密州賴昌人辛雍係知縣資序與
鎮同鄉遂於吏部取知州通判合得一闕差雍為光祿
寺丞宣義郎李振者素無長才異効未嘗歷繁要任使

止緣其父評曾與縝同定地界遂用振治煩劇去處作
選差闕差振知雍邱縣是以一邑之民棄於孺子之手
此徇私壞法無復畏避也翟思所以降知南康軍者蓋
思為御史日曾言縝受燕復馬不償其價故也黃履所
以落侍講知越州者蓋履為中丞日言縝之姪宗道宗
古避親遷換不當奉聖旨今後差除三省同進呈故也
此皆報怨復仇無所忌憚也張璠之為人柔邪猥佞善
能窺人主之意隨勢所在而依附之往往以危機中人

熙寧初擢在條例司講議後法遂置儒館預諫列唯諾
備位無所發明常持兩端先帝聖慮高遠察見反覆斥
逐於外復為王珪出力援引試知制誥兼知諫院珪實
欲使之在言路以杜塞內外耳目天下有志之士無不
扼腕憤疾後為翰林學士同舒亶判國子監深交於亶
以至株連大獄璪有力焉尋判司農寺詳定官制遂忝
執政及先帝升遐陛下即位太母垂簾保佑而璪貪天
之功自謂顧託之重立黨市恩為持寵固祿之計每差

一官除一局則以簡札諭人掠美收惠而後降其命成都路樵茶司勾當公事張同者乃隨州簽判王經臣之甥也同之姊當嫁故益王向經而璪之姊乃嫁經臣璪之與張同固非近親今乃與同書問往還甚於骨肉交通問遺財賄公行原其所以結張同之心則姦邪可知矣璪事先帝不為不久謂天下利害不知耶則兩次在言路矣謂土木之後不知耶則嘗判將作監矣謂苗役之法不干預耶則嘗判司農寺矣謂官品迂滯不見本

末耶則嘗充詳定官矣謂刑獄羅織非其責耶則嘗以
蘇軾事欲置於死逮張方平韓維范鎮司馬光矣此二
人者其操行則如彼其政事則如此伏望陛下博詢衆
議俯聽臣言早賜罷免天下幸甚陛下若謂先朝大臣
不欲黜責則二府之出須加以美職知大藩於恩禮不
為不重願陛下早賜聖斷陶又言伏見朝廷以福建江
西湖南等路鹽法之敝流毒生靈遂遣使案視具得其
實譴黜聚斂之吏以慰困窮之民天下皆知公議之不

可廢也然事治其終而不治其始罪加於小而不加於
大豈所謂無偏黨之道哉蓋熙寧中章惇察訪湖南日
嘗牒本路提點刑獄朱初平措置鹽事立成般運廣鹽
添額出賣之法當時元未施行及惇參知政事祕書丞
邴亶者邪險急進素為惇所喜迎合惇意推放湖南之
法率爾論奏乞般廣鹽於江西出賣朝廷信之遂以亶
所奏付蹇周輔往江西相度

周輔相度江西廣東賣鹽
在元豐三年九月丁亥二

十八惇乃將亶所說鹽事文字又親為小簡封送周輔

其簡云郊祕丞言鹽事甚備恐欲知利害之詳

郊置文字并章

惇簡見在蹇周輔處乞取索照會

所以蹇周輔順承風旨立成江西之

法添額最重為害最深然則江西之法乃惇主之於內

周輔行之於外情狀表裏灼然可見其後惇為門下侍

郎周輔知開封府於元豐六年十二月周輔又奏乞荆

湖南路郴道州隣接韶連二州可以通般廣鹽數百萬

代淮鹽出賣却僭那舊賣淮鹽於潭衡永全邵等州並

乞依倣江西廣東路條法施行當月十八日章惇奉聖

旨差本路轉運判官陳偲提舉常平等事張士澄計會
本路提刑司根檢章惇昨往本路察訪日牒朱初平相
度鹽法一宗文字看詳措置聞奏并送下邾叟奏請亦
乞郴道全州般賣廣鹽並委陳偲等相度是致偲等立
成添額之法施行未久一路騷然上煩朝廷遣使案察
臣今伏詳按察陳次升奏狀內明言元豐六年十二月
蹇周輔所奏奉聖旨委陳偲等相度仍令檢章惇牒朱
初平一宗文字看詳措置及送邾叟狀亦付陳偲等

陳次

升奏狀見在刑部乞取索照用

於是又見湖南之法亦出於惇其迹甚

明無可疑惑蓋惇始立湖南之法雖未行於本路而江西依倣推行已有厚利遂諷蹇周輔邨置各令奏請已獨主而行之然則江西湖南運鹽添額之害皆惇所倡周輔輩從而和之也按惇備位二府不以道輔朝廷而乃首建邪議與小人相附會徇利肆毒貽害生民其罪甚大今蹇周輔張士澄魏綸朱彥博等皆已黜逐而惇獨不問非大公至治之法無以戒天下惇雖以惇慢罷

免而運鹽之過未治意朝廷未知也臣愚伏願陛下付有司根治其罪懲以典刑使賊民罔上之臣少知畏懼臣又聞惇於熙寧八年任三司使日起請乞京東河北榷鹽奏其狀乃曰河北陝西並為邊防今陝西榷鹽而河北獨不榷此祖宗一時誤恩也彼時朝旨依惇之請召京東提舉鹽事周革入見委陳朴王子淵相度將欲施行為文彥博論奏遂罷其事然文案條目具在逐路運司以致李察吳居厚呂孝廉等檢行舊法使一道之

民罹此刻剝其謀本出於惇伏望聖慈一就根究施行

仍乞改正京東河北鹽法

按神宗實錄委陳惲張士澄措置湖南鹽法乃六年十二

月十四日甲申也此云十八日恐誤文彦博奏罷河北賣鹽實錄殊不載已具注在熙寧八年六月十八日戊申周輔奏行湖南鹽法時實為戶部侍郎未知開封府也七年五月九日知開封張士澄衝替邢亶送吏部事在此月四日三月十八日孫升疏可考之

陶又言伏謂朝廷差除之法大

別有三自兩府而下至侍從官悉稟聖旨然後除授此中書不敢專也自卿監而下及已經進擢或寄祿至中散大夫者皆由堂除此吏部不敢預也自朝議大夫而

下受常調差遣者皆歸吏部此中書不可侵也法度之
設至詳至密所以防大臣之專恣革小人之僥倖也恭
惟神宗在御深究其弊凡堂選奏舉之類並悉罷去以
示大公之道因去年八月中執政申請以繁劇去處重
法地分為詞收占吏部所用知州通判知縣并在京庫
務寺監丞闕六十餘處並歸中書取旨選差之後除吏
之敝私徇寢多天下州郡除別京大府并元係堂除處
及取旨選差并元屬八路指射外其歸於吏部以待常

調者數極少而員極多待次之士遠至二三年近須一

歲或有一闕可就則中書取而差他人矣或受一闕而

去則中書又奪而惠他人矣處州之胡宗質

元年正月二日

陸

州之李孝廣

閏二月八日

滁州之陳知新

閏二月八日

光州之燕

介均州之劉斐

閏二月八日

永州之吳潛

正月六日

此六郡者皆

非元係堂除去處而中書取以差也吏部差王照知海

州藥子元通判瀛州方蒙知咸平縣皆數月矣中書乃

以石麟之知海州

元年正月十八日

胡及通判瀛州孫純知咸

平縣皆奪而惠之也若謂胡宗質李孝廣陳知新自提
舉得替燕介係中散大夫石麟之曾任太常官皆非吏
部可差之人則當契勘堂除州郡而差不當取吏部見
使之闕及奪他人已受者與之也若謂朝廷審擇庶官
執政惟才是用則劉斐曾任知州以失入死罪責降吳
潛曾為運判以刻剝苛細罷官皆非所謂才者而近方
牽復並先除郡士論喧沸已謂不平然又有甚於此者
蓋胡及嘗為開封府判官以不能檢束去職纔送吏部

使得堂除孫純以受贓致罪止緣宰相之妻族乃受畿
邑又皆奪佗人之有而與之

謂胡及衝藥子
元孫純衝方蒙

王說前知

徐州附會吳居厚培斂害物得替歸部忽除省郎為人

所彈乃罷其職今則差知密州

二月一日說除倉部
郎閏月四日知密州陸

師淵前知開封縣稅入中限猶未造簿以弛慢衝替今

則差知宿州

二月二日

且胡及送吏部王說罷省郎皆是朝

廷顯責詔墨未乾而中書已有選授告命之出不述所

因陸師淵與劉斐吳潛均是衝替而師淵又得元係堂

除大郡

謂知宿州

私曲縱橫莫甚於此陛下黜之則執政升

之陛下退之則執政進之怨歸於上而恩出於下非今日之所宜有夫威福者天子之所得專法度者大臣之所當守今大臣進退羣吏一出己意不守法度而欲專威福矣臣恐朝廷不尊而紀綱紊亂當此之時宜戒其漸也伏願聖慈將合係堂除闕編為一等今後如有合得堂除之人只於前項去處定差其曾經擢用而非次差替罷或責降牽復不送吏部者於合得堂除人之下

別為一等依名次先後差遣並不得於吏部所使闕差授及衝已授之人所有元豐八年八月取旨選差條貫乞賜刪改又言臣又聞二月九日吏部曉示光祿寺丞并少府監丞闕於格先問知州次問通判次問知縣人凡願就者二十餘狀況此二闕不係堂除又非取旨選差之數自初九日至十六日除寒食假外曉示才得兩日中書已差知縣人辛雍為光祿丞監當人文永世為少府丞進擬之際其速如此若非請託公行則是主張

有素吏部使闕遂成空文合入之人不可復得伏望朝廷詳察早設防禁辛雍文永世之事尤駭士人耳目伏乞追改以存公議胡宗質李孝廣陳知新燕介石麟之胡及孫純王說陸師淵劉斐吳潛等差遣亦乞勘當如未到任即乞改正施行

三月十四日詔自今堂差不得衡吏部已注受人蓋從陶議也

二月十日劉摯有章論王說政目閏二月六日宣義文永世少府丞朝散辛雍光祿丞胡宗質元年二月二日知處州李孝廣元年閏二月八日以朝散知滁州燕介當檢劉斐元新年閏二月八日以朝奉大夫知均州吳潛元年二月六日以朝散知永州石麟之元年正月十八日知海州胡

及元年正月十八日以府推送吏部孫純當檢王說元
年二月二日以朝議為倉中閏二月四日知密州陸師
淵元年二月
二日知宿州